


公程餘事

67

367



始



公程餘事

67
367

67
367



公
程
餘
事

中
坂
茂
勝
寄
贈

大正
3. 10. 19
寄贈

公程餘事序

上毛中澤蓮塘君等。編次岐峯棟居先生在東部遞信局日所作之詩。爲一小冊子。將付之梓。命曰公程餘事。先生令予序之。予久辱先生知遇。豈可無一言哉。竊意輓近作詩者多矣。然讀其詩。而其性情可得而知者無幾也。先生爲人寬宏謹恪。謙虛自持。常歎世之輕佻。自以迴瀾爲己任。公事掌鞅。黽勉不怠。其詩賦。負出時流者。非無以也。予觀世之在官者。醒齷于簿書會稽之間。偶作詩賦。亦事藻繪。街浮華耳。其休官退隱者。寄傲丘嶽。放肆文酒。或假語於獨善。或

託言於育英。亦猶有不免怫鬱不平情者。故其詩皆不能見性情也。先生之於詩。固爲緒餘。然志高氣俊。至祇役交友。上下遇合。緩急出處。觸情縈懷。罔不流露于吟詠之間。而其詩非溫柔敦厚之文。則忠愛惻怛之音也。故讀先生詩。匪獨可知其性情。并可以知其言行也。若徒以先生爲放擲公事。嘲弄風月。而品隲字句之工拙者。曷足以與語先生哉。予奉職遞信局。承乏講師。而先生令予批評且序。詩云。他山之石。可以攻玉。先生以予爲他山之石者也耶。

吳雲清水孝拜譔

大正三年九月

公程餘事

棟居岐峰著

中澤蓮塘

新井成蹊同輯

土屋寒綠

明治辛亥七月十一日赴小笠原島船中

水程萬里入雙眸。月照船窓氣似秋。休道先生無韻事。人間爲吏亦風流。

土居香國曰有如此韻事何謙讓之甚

同十二日船上即日

巨船蹴浪到南溟。島影參差雲氣青。可莫高吟驚海若。鯤翔鯨迅水冥冥。

行程會事

香國曰異地風景宛然在目

八丈島懷古

八丈島別名女護島昔時為流謫地島中多杜鵑

繫纜來遊女護洲。山河悵望入新秋。如聞冤鬼啾啾哭。杜宇一聲啼血愁。

香國曰一結寓無限感愴

同十四日船上曉景

曉起開窓海似油。夏雲香靄接天浮。忽看旭日排波出。殘影遙懸月一鉤。

香國曰時所有景而前人未道破

小笠原島父島所見

芭蕉葉下夜風香。椰子梢頭秋月涼。扇浦之山雙見水。纖

塵不到是仙鄉。

鵬翼垂天雲氣橫。南溟萬里一身輕。林投樹下清陰密。獨

木舟尋涼處行。林投樹本島特有之樹名

香國曰二絕父島好箇竹枝

過父島歸化人莊

父島奧村開一鄉。居人編屋用檳榔。傳聞異族漁郎裔。聖代今霑恩露光。

香國曰聖德無限我邦桃源與秦代異岩溪裳川曰祇役之中吟咏遣懷知是一段高興高吟驚海若悵望弔冤鬼詩中傑特文字殆使人寘身於文身卉服之蠻島中人間為吏亦風流岩村貫堂貴爵昔已有此句亦不妨也

八月一日晚入甲州谷村

一味新涼徹骨清。烟嵐吐出夕陽明。富峰當面鍾靈氣。起

公程餘事

二

敬更欽知己情。

香國曰承句好句洵不易得
裳川曰詩亦如富峰八面玲瓏

同三日入甲府

疎雨涼颿入峽陽。依然形勝宛如囊。機山遺趾今何在。金
嶽流雲曳恨長。

香國曰懷古感愴紙鳴字立
裳川曰詩有莽蒼之氣

雨中甲府客舍

峽陽爲客暫淹留。霑雨淋淋何日休。想起去年洵濫害。廟
堂今奈救生謀。

香國曰此是
仁者之言

甲州途上

秋風吹鬢客衣輕。于役勞勞幾里程。愧我非才難就志。半
生空托水雲情。

香國曰置心於水雲高于人幾等
裳川曰亦敦厚之旨

再遊身延山

又訪延山蓮社盟。菩提樹下覺心清。夢回六百年前跡。華
雨香風護梵城。

香國曰可
發深省

次朝堂蘆澤君韻

僧舍繞山林影微。香煙靄靄化雲飛。不知凡骨依然在。脫
却世塵忘是非。

香國曰六
根清淨

分程會事
雨中傲轎發身延山至富士川

山色雨深烟樹冥。轎輿曉發趁涼行。板橋苔滑人蹤少。渡口無舟水自鳴。

香國曰亦是渡口無人舟自橫之意

雨中下富士川

奇巖怪石碧重重。雲樹參差雨色濃。卅里急湍舟若矢。一篙碎影玉芙蓉。

裳川曰奇景逼眼給賞不暇香國曰不見彼美人真勞我心

憶故梶浦學士

一自斯文失達師。如何相遇竟無期。憶曾寧樂同遊夕。屏燭高談月上時。

香國曰悼惜之情妮妮動人

次湯河元臣君葉山客舍題壁詩

君時養痾於葉山轉結故及

雨霽湘江烟霧濃。窓前相對玉芙蓉。故人入夢醒無跡。水樹雲山恨萬重。

香國曰情思綿綿不盡

次西國手誕辰詩韻

三折其肱聲價增。門前乞治俗兼僧。知君能繼傳家業。醫國由來力可勝。杏林寄跡幾春過。百歲浮生付浩歌。方寸自容江海量。細流溷濁不辭多。

清水吳雲曰仁術當時果有幾人使俗醫愧死又曰國手不惑年過而百事如流無措無滯亦可知

故福田理兵衛翁依勤王之功特旨叙從五位余

與翁子純一君相識乃謹賦以賀

國步艱難何日安。欽君義膽與忠肝。聖明恩澤沾枯骨。榮位光輝竹帛看。

吳雲曰翁身骨既朽而心神終不死地下亦應喜獲知己

寄松祝為松田氏

亭亭高百尺。箇是棟梁材。千歲君家鎮。祥雲滿紫臺。

吳雲曰松田氏累世為家國棟梁材亦可知

病中作

平生獨撫腹便便。又詫心腸百鍊堅。一朝病牀親藥餌。却哈經笥本楞然。

裳川曰莊語忽為佳謔
吳雲曰便腹中抱負高大起則所吐如萬嶽泉千言立成可知矣

十一月十五日宮中有觀菊會余為病辭陪

禁城此日錦筵開。臥病今乖一賞陪。籬外菊花如有意。憑將蝶使送香來。

吳雲曰蝶使亦君恩名臣感懷人有不能知者

常州途上

身似孤雲從去留。長亭短驛路悠悠。昨過房甲今常總。足跡既周關八州。

香國曰格調絕佳
吳雲曰高調

泊石岡郵便局長別墅成趣園

故人家在石陵隅。老樹蒼苔點汗無。成趣園中別成趣。右

看筑嶺左霞湖。

香國曰曲折細潤妙不可階

又時值中秋

秋風來泊故人家。野外高樓一望遐。此夜滿天清似碧。月光如水蘸窓紗。

香國曰一誦清涼襲人

水戶懷古

水城從古有明君。文采德馨齊拔群。誰識維新宏業策。淵源在此仰遺勳。

香國曰史筆犀利

謁太田瑞龍山水戶家廟

瑞龍山上氣凌空。祠廟於今畏敬崇。編史尊王夙昭志。作箴守儉自成風。賢君水府斯文燦。壯士櫻門濺血紅。威烈二公傳萬古。芳名膏澤竟無窮。

香國曰領聯精透頸聯文燦武烈自見

鹽原回顧橋

山光水色利名忘。行放双眸回顧長。楓葉蘆花秋已半。思詩人在白雲鄉。

香國曰自是詩人口吻

贈鹽原太古館主人

地靜日長如太古。忘機跌座氣方清。山皆好友人知己。吟榻臨風亦有情。

公程餘事

香國曰不管有情亦有味

雨中發鹽原

雲烟無意過群峯。隔岸紅楓帶雨濃。身入丹青秋一幅。優遊隔斷世間蹤。

香國曰承句真個圖畫

壬子二月下浣常州途上作

笑趁東風早出城。見春亦自有公程。誰知車上詩消息。筑嶺霞湖互送迎。

吳雲曰筑嶺明媚霞湖淨澄恨吾不見輕車畫裏人
裳川曰唐賢有云只見公程不見春如岐峯局長能免為百花所笑歟見春亦自有公程何等溫藉

下館客舍

烟霞有疾奈難醫。敢道官羈亦俗羈。賴是朝來無一事。看山抱膝只思詩。

吳雲曰見奪俗務者無此高致先生此行春寒逼身亦恐應無遑燎吟衣矣
裳川曰流水聲中看竹行不相及也遠矣

二月廿七日臨下野鹿沼農商工談話會贈長井

郡長

百里江山入下毛。治家興產萬民勞。由來斯地良風俗。更望依君名實高。

吳雲曰郡守欲不舉實豈可得哉

同廿八日謁熊澤蕃山先生墓

經綸卓見獨推君。一瓣心香我獨焚。曾未瘞名唯瘞骨。忠魂千古托孤墳。

公程餘事

分程餘事

吳雲曰覺返春山先生英魂

同廿九日過谷中村

廢址茫茫十里程。田園無復試春耕。頻年水旱生民苦。鄭繪如今幸未成。

吳雲曰水旱何人責將令當路者愧死
裳川曰以上二首景仰之情弔災之情自在筆先本非流連光景之比

偶感

一從書劍誤生涯。宿志百年知者誰。世事雲烟歸過眼。鬢邊早已欲成絲。

裳川曰人不居逆境強為此語恐是無病而呻吟者
吳雲曰僕昔有詩奔走天涯頭髮白故園籬菊為誰黃今讀此詩更多感吾已黑白半頭無一所成每隱阿爺而鐮霜毛先生知之否

小川途上作

雪餘泥滑路迢迢。何日春風上柳條。不解鄭家詩思好。小車載夢過江橋。

吳雲曰自是幽人作

謁新田神社

四顧茫茫十里村。行尋故址弔忠魂。山河歷歷仍依舊。千古興亡跡自存。

吳雲曰先生弔忠魂吁嗟焉耳
森川竹磬曰別無新意而風調絕佳餘韻悠揚

旅中偶感

客裡風塵二十年。何當嘉遜賦歸田。看來得失幻耶夢。時讀縛鷄詩一篇。杜詩縛鷄行說鷄蟲得失以戒人事

裳川曰托興不淺
吳雲曰江湖山林不憂國者所安先生何為賦歸田

雨中上二荒山

一行魚貫雨中攀。松柏嶮青危翠間。休怪思詩回首望。此山東去更無山。

裳川曰蓋非無山無山可入詩也

中禪寺湖

天高氣爽出塵寰。萬頃湖波激灩澦。乍有雲光來潑眼。夕陽烘托畫中山。

裳川曰圓嶠一派畫家宜為粉本竹溪曰秀挺奇拔加以雋思清韻殊見才力

華嚴瀑

飛瀑懸邊點晚楓。差池石燕剪山風。前峰後壑雲吞吐。最叵端倪是化工。
石燕唯在華嚴瀑中本邦他無此物

裳川曰筆破天機石燕一句不移得於他

足尾銅山懷故古川翁

人造功追天造尊。一生機略報君恩。川翁不借計然策。三字興家運鈍根。
古川翁常曰凡立身要訣在運鈍根三字

裳川曰蠶也吐舌吳雲曰遺香留在運鈍根三字中

妙義山

妙義山深帶碧皴。奇巖立戟勢嶙峋。夕陽秋色楓千樹。却笑停車坐愛人。

吳雲曰忙裏領妙義山風光氣韻勝停車客

先登妙義山大砲岩

危棧懸天匍匐行。神剗鬼斧怪巖橫。風生雲洞山雲迸。博

得登臨第一名。

吳雲曰先生身世
盡然何徒先登乎

歸途中

于役早將過二旬。暫爲山水勝遊身。休言忙裏竟無得。煙
影風情詩思真。

竹磯曰忙裏偷閒却有風
趣門外漢想到不得耳

訪鵜飼山遠妙寺日蓮上人濟度靈場

妙法蓮華舊道場。佛燈不滅萬年光。傑僧天地施功德。山
讓其高水讓長。

裳川曰頌蓮公功德蔑以加焉
吳雲曰吾亦以爲日蓮本朝高僧傑遺德何物比

贈渡邊澤次郎君君多藏圖書故及

江山路遠夢魂牽。每望暮雲經幾年。安得相逢重話舊。書
中尙友盡名賢。

吳雲曰他日相逢
定應有刮目之感

明治壬子三月 東宮殿下行啓甲府喜九馬扈從

一夕蒙陪食之榮紀恩

鶴駕龍符入峽陽。千門旗影映朝光。微臣此夕叨陪宴。贊
德何人進樂章。

裳川曰和雅之音
吳雲曰群鷄中一鶴立之趣有斯傑作亦殿下之賜也者非耶

詠高山仲繩

唱義論時草莽臣。伊人泣癖見天真。丹心碧血留千古。一
死當年感鬼神。

吳雲曰仲繩正氣滿天地死而為山嶽為江河者溢于詩句

明治壬子五月三日 天皇陛下幸千葉縣四

街道觀砲兵射擊演習喜九馬扈從謹賦

車駕親臨遠閱兵。砲聲連發百雷轟。允文允武聖天子。日

照軍袍赫赫明。

吳雲曰聖上威德將卒忠義亦赫赫

明治壬子五月十三日 皇太子殿下行啓中央

郵便電信電話各局喜九馬不堪感喜謹賦五言律

紀事

南風回夏候。萬物愈清新。少海龍符護。前星鶴駕巡。樂章須贊德。膏澤每霑民。玉裕天姿貴。葵心向日真。

裳川曰此詩取鏡於唐賢應令諸作雅音奕奕吳雲曰一遊為邦家度者如目見

謹奉悼明治天皇

天地陰沈諒闇時。臨風一慟有餘悲。已欽偉業兼欽德。六萬國風千載垂。

裳川曰先皇大業盛德盡在國風中荆山之鼎橋山之劍豈可同日而論哉

遊秩父長瀨

松風如雨夏猶寒。偶泛扁舟下急湍。忽有蘋花香滿水。遊鱗潑刺上輕竿。

裳川曰長瀨之勝近時喧傳予今夏有一遊之約不堪魂飛神往吳雲曰吾恨未經過焉耳

大宮

擺脫塵緣昨出城。青山澹慮一身輕。車聲轆轤兩三里。多

在綠陰深處行。

吳雲曰胸中無一點塵何等有趣

三峯山

峻阪羊腸路九盤。攢峰如劍鳥飛難。靈場唯是聞天籟。六月山中夏欲寒。

吳雲曰危險可想

過武田城址

往事茫茫那處尋。山河形勝至于今。英雄一去風雲散。哀壑松濤暮氣深。

吳雲曰山河帶當年愁令行人肝膽寒
裳川曰秩父即景與大宮即興一一可畫圖而三峰奇雋武田城址雄深一攬其勝一弔其跡共盡絕句能事

壬子夏入甲府

南船北馬一身忙。幾逐清涼入甲陽。峽月近人如舊識。新詩又滿一詩囊。

吳雲曰關身却多事吟囊重定如何

遊千葉縣湊途上口吟

村田漠漠稻雲垂。時有歸童驅犢兒。暮色先催垂柳水。一螢流處晚風吹。

吳雲曰不求工而工車上景動意中詩者
裳川曰予信州途上詩隔牆花白暮烟浮澗戶無人野碓幽一點風螢如水夜忽從癡末入新秋即景之語略似

壬子十月七日家兄保病死於朝鮮京城赴葬儀

車中

秋風嶺下洛東津。奔葬天涯涕淚新。知有幽魂離不得。車中猶作夢中人。

秋風嶺洛東江地名

裳川曰言根于心真摯自見

吳雲曰途上風光一入悲愁字字是淚先生中情縱寄長江水一滴能達九泉否

大正元年秋行陸軍特別大演習於武藏野

天皇親統監 喜九馬 扈從得一詩

天子親閱千萬兵。兩軍砲擊百雷鳴。須臾又現太平象。滿耳洋洋萬歲聲。

吳雲曰起承頌今上陛下在治不忘亂之威德轉結唱出臣民懽喜聲尤妙

大正癸丑初春遊修善寺

清江曲曲抱溪樓。更有靈泉出石湫。一路肖廬山上夕。緬思典午舊詩流。

修善寺有肖廬山之稱

裳川曰即興之語饒有深致

吳雲曰古調流麗不讓唐詩

源家骨肉互爭勳。遺恨千年有斷墳。追弔往時成敗跡。利名畢竟屬紛紛。

吳雲曰令人想骨肉丘山重利名雪紛紛

至湯島車上口占

雨霽江山一色明。長堤幾里路縱橫。風刀劈面肌生粟。重襲貂裘尙厭輕。

吳雲曰起承如畫轉合奇

寒可想先生詩思亦應水

車中見富士山

富峰秀色玉蓮開。白雪玲瓏絕點埃。仰見扶桑東海鎮。萬山遶膝似童孩。

吳雲曰有此哉芙蓉峰之稱詠得不染塵姿而妙

遊塔澤環翠樓

松杉環屋翠重重。雨色半峯晴半峰。浴後尋詩何處好。閒中公事付孤筇。

吳雲曰浴後新涼味城市客有誰識
袁川曰前詩秀麗後詩淡宕身居劇職閒中公事如是深可歎羨

群馬縣吾妻郡途上

水驛山亭忽有詩。曉來一路傲車馳。暫忘公事平生劇。遮莫中原逐鹿時。

袁川曰公事忘劇亦詩之賜歟岐峰亦時為我黨之人歟
吳雲曰脫塵網殆如飛鴻劇務中自有閒日月將令黨人愧泣

自中條赴四萬途上

千山風靜鎖塵煙。車上雨催行客眠。談笑有時邀好句。閒

情一一入詩篇。

吳雲曰語言情思盡是詩

四萬

碧水青山物外情。寒煙疎雨滿襟清。此區占得林泉勝。頓覺世間榮辱輕。

吳雲曰起承如誦楊萬里詩鮮麗有味

發四萬途上

春潭二月翠煙浮。古徑人稀萬象幽。日出煙消雲散處。連峯帶雪入吟眸。

吳雲曰起承幽邃尤妙轉合如誦劔南詩

抵川原畑此地有關東耶馬溪之名

山通鳥道一天明。石骨稜稜氣勢爭。水面如藍橋似畫。關東耶馬不乖名。

吳雲曰馬溪以風光如畫名天下此別鑲瓊玉者孰美孰佳

抵草津途上

兩邊白壁屹如峰。一路纔通絕客蹤。鏡上吟鞋清徹骨。都人識否雪山冬。

吳雲曰殆如行水晶宮裏心身到處清豈徒吟骨乎

草津

處處雲收曙色開。倚崖沿壑有高臺。源泉一派通山笕。引得千槽暖玉來。

裳川曰本地景狀宛然在目吳雲曰實景如畫

自草津至中條途上

萬木蕭條烏雀稀。枯蘆洲上冷雲飛。前溪日落看難見。馬上思詩晚獨歸。

吳雲曰描出蕭條之景而妙詩句在前溪模糊中而成

伊香保

泉脈深穿火井通。浴餘一洗百憂空。始知不老長生術。偏在悠悠自適中。

吳雲曰採藥從赤松子者不必真仙真仙食穀在人間者非耶

香峯樓上剪燈時。夜雪聽窓各賦詩。休道峭寒來入座。春風別在此中吹。

吳雲曰春風可羨恨吾不俱杯酌溫冷骨裳川曰妙寫理趣不墮理窟

發澁川赴沼田途上

刀根江上赤城山。千古依然不改顏。天地文章經緯美。可知氣脈在斯間。

吳雲曰名山勝水盡是先生未讀書者何等高趣

沼田

放眼丹青一幅中。群峯如戟刺蒼穹。悠悠凭檻思詩處。枯葉婆娑月似弓。

吳雲曰起承如倪山秀麗可想轉合亦入佳境

伊勢崎偶作

刀寧河邊水浩洋。榛峯山下樹蒼蒼。上毛自古偉人窟。多助忠治彥九郎。

吳雲曰名山出偉人者非耶

憶沼田義民茂左衛門

苛政當年不忍言。蒼生飢餓皆歎冤。挺身急訴果何者。義俠看來茂左門。

吳雲曰詩句出於自然衷誠

經館林躑躅岡至茂林寺見分福茶釜

躑躅丘邊水孕風。茂林寺畔夕陽空。里人頻說奇瓶事。憶起當年狸老翁。

裳川曰予有俳句云茂林寺乃釜通計出左牟月廼呀吳雲曰奇豈釜而已哉詩亦奇

偶感

蹉跎頽白志難成。豈付漁樵送此生。胸裏萬憂何日遣。一

舟湖海載書行。

吳雲曰先生功成名遂而尚
有此感令寒生不能再讀

大正癸丑三月扈從 鳳駕赴千葉

一路東風瑞色開。金鑾徐動向高臺。臣心正與葵心似。又
趁日章旗影來。

佐藤六石曰葵心傾日以
自比與正見忠厚之旨

稻毛口占

家在青松白石間。何來一隻見孤鷗。斷霞落日明于晝。嘯
傲誰人不忘還。

六石曰青松白石斷霞
落日數字已明于晝

癸丑七月遊輕井澤邂逅舊友櫻井子民

都門北去杳山川。七月聞鶯小洞天。群嶂亦知非俗客。迎
來一一聳吟肩。

香國曰奇想天開
吳雲曰到處有別天何等襟懷

川中島懷古

戰跡茫茫何處存。當年孤注賭乾坤。斷霞零亂川原遠。鴉
陣如雲落日屯。

吳雲曰舊時無可跡茫乎煙耳無限感慨
裳川曰落日川原空見鴉陣中有懷古情

偶感 此行臨各局訓示又應囑
講話者十數回句中故及

朝發信陽夕越州。卸將行李那邊收。客中旬日何多事。說
去說來無暫休。

吳雲曰奔走道途不知倦
忘令人想子興當年事

偶成

按部一旬猶未還。身如野鶴白雲閑。風流情思人知否。隨處停車且看山。

吳雲曰適吾適耳達官風流可想如鶴閑如雲清中有處事如水者

戲示隨員中村氏

玉鞍去向一青樓。綠酒紅燈賦綺遊。縷縷情如灞橋柳。知君別後不勝秋。

香國曰情緒辛綿寫出入妙吳雲曰情思綿綿佳客將醉死可謂大愉快中村氏豈忘乎未忘乎

遊佐渡

翩翩白鷺掠舳來。貝闕珠宮安在哉。浩蕩水天唯一碧。風光長占小蓬萊。

香國曰使人有策鼇濯足之想

謁真野陵

真野秋風陵樹深。陪臣執命抑何心。忍言承久北巡事。但有松聲送古今。

吳雲曰感慨無極裳川曰懷古之作不敢着議論議論在中是古作者之遺型

鯨波蒼海樓即日

蒼海波平一望悠。漁舟數點似浮鷗。水天杳杳三千里。彷彿青山是滿洲。

香國曰雄濶可喜吳雲曰意氣有吞天之概不用工而工自是唐趣

遊赤倉溫泉

妙香山麓絕塵埃。過眼風煙晴景開。浴後振衣心自潤。更

無手版促人來。

吳雲曰公餘纔
滌塵心亦可知

遊天龍峽

奇岩怪石夾江湍。龍峽風光袖手看。舟裏涼氛堪可掬。一
峰六月雪生寒。

吳雲曰何等爽快
涼氣定應濕吟衣

越大平嶺

疑是登臨躡華嵩。岐嶒形勝古來雄。喬杉老檜晝猶暗。畢
竟唯歸造化功。

吳雲曰危峯雄
險令人凜慄

八月二十一日伺候日光離宮

晃山元是脫塵寰。况亦天皇玉趾攀。雨露聖恩霑萬物。微
臣今日拜龍顏。

吳雲曰聖上德宏
大及山川草木

觀晃山寂光瀑

小溪影暗老杉邊。地劃仙凡別有天。一嘯振衣看大瀑。風
生兩腋欲登仙。

吳雲曰真箇飄飄
御風羽化登仙

又得一絕

靈境與吾有宿緣。無端來此意陶然。停筇坐愛紅橋外。風
光依舊入詩篇。

余二十餘年
前游此地

吳雲曰名士入
名山自有宿緣

觀霧降瀧

荒原行盡四山鮮。崖角忽看飛瀑懸。身在雲靄模糊外。恍疑白霧降中天。

吳雲曰一幅活畫中真仙可笑採藥學仙者

八月抵三島車中邂逅舊友石川土井伊藤諸兄
句中故及

夏雨新過涼意生。扇風不假一身輕。車中况與故人會。品水評山無限情。

吳雲曰邂逅故人品水評山至樂無過焉者之情溢句中

再遊佐野瀑園

飛泉千仞水連天。空翠霏霏斜照邊。嗟我風塵霜鬢改。重

來忍看景依然。

吳雲曰瀑若知先生顯榮則將曰風光同前遊更無變處是愧耳

賦下田舊遊似渡邊詞兄

憶起豆南携手遊。青燈何識歎霜頭。烟波空望洞庭晚。風雨徒尋楚澤秋。一片孤懷歸舊夢。半生壯志惹新愁。當年立馬山河在。蒼翠映瀾千古流。

吳雲曰令渡兄不堪懷舊之情先生詩每有謙辭

似舊友

秋雨春風多所思。何圖今日話襟期。天涯雲樹十年夢。此恨此情知者誰。

裳川曰情深之語殆移我心

遊辨天島

天女洲邊宿雨收。暮烟生處水如油。十年重訪孤亭裡。依舊相知秉燭遊。

吳雲曰有巴山西窓趣但彼夜雨此雨後舊知秉燭遊之情則相同

聞新居郵便局長飯田武平君逝去

濱名湖上水迢迢。遊迹尋來歲月遙。回首池塘猶似舊。遊魂今日奈難招。

吳雲曰何等悲痛

濱松懷古

曳馬城邊古木蒼。天龍橋下水雲長。誰知百戰干戈地。化作繁華歌吹場。

吳雲曰碧海桑田之變如此應想如今三方開墾土盡是當年戰死骸裳川曰意稍屬習見亦是佳作足以示人

十月隨行元田遞相至甲府車中賦呈

勁節多年志不空。廟堂今日見斯公。平生韻事也堪羨。名士自存高士風。

吳雲曰豪宕休官風流過遊者比比皆是如遞相在廟堂有林下風者今世界有幾人

次元田遞相九州行瑤韻

長亭短驛儘官遊。足跡遙傳十二州。瑞色如斯滿田圃。堯民鼓腹祝成秋。

吳雲曰自是太平象

隨元田遞相至甲府昨大雨今朝漸晴人謂大臣

日和句中故及

峽中山色似含情。短驛長亭送又迎。父老笑談天候事。大臣過處雨方晴。

吳雲曰說出遞相隱德而妙

十月遊澁川

榛名山色古毛州。追逐吟哦春又秋。富貴在天非我事。人生至樂只交遊。

利根川

萬里秋江水似烟。香魚潑刺落梁邊。滿盤忽覺膾材美。更卜何樓張盛筵。

秋日自靜岡歸途車中偶吟

相水駿山如舊知。何況富岳是吾師。自憐藻思半消了。終

日苦吟難就詩。

吳雲曰藻思如溟渤波瀾筆底浮何詩不成

世事有感

男子元來尚至誠。不關世上是非評。看來快事尤何物。唯博濟時千載名。

吳雲曰氣象不讓聖賢先生性情真然

再赴水戶

吟衣又向客亭行。一路秋風萬里情。車上懶聞名利事。閑看筑嶺白雲橫。

吳雲曰客心欲老煙霞此意奚有外物遮白雲時來相訪耳

水戶彰考館

藏大日本史原稿處其他奇書珍籍不尠

奇書萬卷水城珍。彰考之名不負真。義烈遺風傳百世。維新功業絕無倫。

吳雲曰彰得彰考館之美無憾

偶成

風塵放浪愧無名。知命笑吾霜鬢生。去路悠悠雲渺渺。加餐更欲上前程。

吳雲曰賴之五十尋禪榻先生知命既上峻層尚如此卿相不甘可知矣如不肖徒驚鬢邊雪耳慚愧慚愧

秋感

滿野香雲熟稻秋。太平有象不知愁。却思粒粒苦辛事。臺閣諸公有解不。

吳雲曰詠豐稷令臺閣諸公反省

偶作

一行爲吏是耶非。身似天邊旅鴈飛。秋雨春風人欲老。半生如夢壯心違。

吳雲曰先生素心恐不違蓋謙辭

甲寅二月遊伊豆

東風吹暖遍山隈。草木欣欣榮自催。難去煙霞風月疾。復携吟杖訪春來。

香國曰高趣可欽吳雲曰欲醫煙霞痼疾遂難醫風流之極

三遊下田憶松陰先生

遠尋遺跡暗愁多。高嘯先生浩浩歌。雨雲幾年碑石滑。風塵回首淚滂沱。

香國曰所不道破含許多感慨
吳雲曰高嘯餘音定與松籟相應血淚洒苔石

下田逢老妓某戲贈

老來相遇感前緣。只有相思似舊年。借問霜港半宵夢。飛
花繚亂散春烟。

又

萍水相逢話舊時。佳人薄命最堪憐。紅慵翠悶唯催淚。春
到落花多所思。

裳川曰才人口吻
吳雲曰二首秀麗而懷舊之情頗似柳北翁

伊豆湯島

天嶺古關行路難。樹梢四月雪猶殘。時平終未聞鷄起。臥
與故人分夜寒。

吳雲曰氣
韻絕高

彌陀窟

峭壁危巖苔色皴。窟如巨鰐欲吞人。靈燈光現彌陀佛。地
上生窺風水輪。風水輪世
所謂奈落

吳雲曰筆鋒
直衝彌陀窟

手石浦

突兀危巖老樹懸。海波萬頃水連天。遙岑青出斷雲外。獨
鳥飛來七島邊。

吳雲曰描
得絕佳

石廊崎

高垂鐵鎖欲攀難。崖樹風回心膽寒。却自古祠堂下瞰。鯤

翔鯨走捲狂瀾。

吳雲曰危險可怕
裳川曰時清關門不鎖驛舍荒鷄不復成惡聲所以有湯島之詩彌陀窟手石浦石廊
崎或以奇幻爭勝或
以雋爽豪宕見妙

長岡溫泉

塵埃一滌豁心胸。閒臥勝他萬戶封。但有風神難寫處。巍
然雲表玉芙蓉。

吳雲曰巍巍識見亦玉芙蓉
香國曰浴後臥看名山中含自家抱負

遊長津呂

古關蕭寂豆陽巔。萬里征鞍情轉牽。莫謂人生行路苦。萍
蓬聚散亦因緣。

香國曰達者之言
吳雲曰自是安命人

泊伊東河合氏別莊

水畔高樓一望遐。清波潏灩抹春霞。醉前獨坐閒無事。半
是思詩半思家。

香國曰情思婉委
吳雲曰閑身却是為閑忙

弔伊東祐親墓

往事茫茫歲月過。松風蕭颯入悲歌。斷碑一片無人掃。萬
古興亡感慨多。

吳雲曰悲歌感慨自
是英雄弔英雄者

為風波更泊伊東

風雨驟來濤作丘。客船不出尚淹留。任他萍跡詩三昧。不
管都門時事稠。

香國曰高趣可欽
吳雲曰詩意超然黨人誦之則果如何

熱海水雲閣夜雨

水雲閣上雨絲絲。半夜鄉思魂夢馳。祇恐明朝猶未霽。淹留行李負歸期。

香國曰客情縷縷言得動人
吳雲曰奉公與孝思油然而溢于紙表

三月十日遊伊豆山

今朝雨霽氣悠然。伊豆汀洲白鷺眠。萬里蒼波望不盡。風帆數片送漁船。

吳雲曰描出實景而妙
香國曰朝晴出漁光景宛然在目

相州湯河原

昨日江上客。今爲山下人。悠悠心自適。到處樂天真。

吳雲曰心
身到處安

遊養生園贈主人大倉翁

沿流傍壑養生園。終日山中不鎖門。太似周文遊囿樂。乃翁功德亦堪尊。

吳雲曰令大倉
翁益勵公共事

函嶺宮下寧樂樓

一樓即是一仙鄉。曉霧纔開幽趣長。浴後振衣凭檻處。某山某水落杯觴。

香國曰爽絕快絕
吳雲曰不真仙則手深杯不得領此晨光

偶感

春山春水思悠悠。到處舊知詩酒遊。南去北來千里客。功

名未敢上心頭。

香國曰一結超脫
吳雲曰富貴功名如漚何由到心頭

公程餘事終

書公程餘事後

群馬縣三等郵便局長諸氏。蒐輯前東部遞信局長棟居岐峰君行役所作之詩。題曰公程餘事。將刷印以頒僚友。中澤新井土屋三氏幹其事。而屬余校次。蓋東部遞信局管掌關東八州及信越二國遞信事業。區域既廣。事務亦頗繁。君曩為之長官。銳意勵精。入則統督局務。出則巡視管內。而其出也。南船北馬。山程水驛。偷閒乘暇。或探奇勝於山阻水涯。或訪古蹟於風饜雪虐。或弔英雄於寒煙荒艸。足迹所至。悉發之於詩。以留鴻爪。其所賦者。積成此編。夫詩者人

之性情所發露。讀其詩。則可以知其人。君雖今轉遞信省電氣局長。諸氏不能復受其指導誘掖。然一讀此編。亦可以爲親接君之音容之想。是諸氏此舉之所以不可已也歟。余深感其厚于誼也。校既畢。因書一言於後。若夫詩之巧處妙處。諸家之評盡焉。讀者自知之矣。余不敢贅。

大正三年九月

篁溪佐伯仲藏拜識

公程餘事跋

人各有職事之當務。又有性情之所適。儻使其所適者與當務者。相助而無妨焉。則其功效必有可觀者矣。昔柳子厚以遊觀爲爲政之具。俾亂慮滯志無所容入。然後理達而事足。夫爲政者固其職事。而遊觀者其性情之所適也。是不獨政事爲然。學問亦然。朱羽皇曰。學問須有閒暇精神。方能領畧天地山川草木禽魚之類。若一意攻苦。非徒絃急柱促。難爲可繼。走馬看花。輕舟放溜。有何意味。夫學問亦固其職事。而有閒暇精神者。方能收遠功。豈非性情之助之耶。

岐峯棟居君。學優而仕。歷任諸官。性好吟咏。曩爲東部遞信局長也。以其職屢巡視關左八州及信越郵遞事業。或駕舟車。或駐驛市。其所躬歷目睹。山川草木禽魚之趣。以至於名勝陳蹟及古英雄爭戰之處。皆著之於詩。題曰公程餘事。此亦職事與性情相助而成。綽有餘裕。固非夫亂慮滯志者之所能。而又足以諷世之徒爲絃急柱促者也。廣勝備員郵職。而辱君之知。受其教督有年矣。君既榮遷他局。而感慕不能禁。因與僚友諸氏相謀。印行其書。永爲記念云。

大正三年九月下澣 上毛 中澤廣勝敬跋

67
367

大正三年十月七日印刷大正三年十月十日發行
編輯者兼發行者群馬縣佐波郡境町大字境町七
十二番地中澤廣勝印刷者東京市日本橋區兜町
二番地神谷岩次郎印刷所東京市日本橋區兜町
二番地東京印刷株式會社

(非賣品)

67
367

終

